



LE GOUVERNEMENT
DU GRAND-DUCHÉ DE LUXEMBOURG
Ministère des Affaires étrangères
et européennes

Le Ministre

Luxembourg, le 26 août 2020

REÇU
Par Alf Christian, 11:07, 26/08/2020

Le Ministre des Affaires étrangères et européennes
à
Monsieur le Ministre aux Relations avec le Parlement

Je vous prie de bien vouloir trouver en annexe, la réponse conjointe de Monsieur le Ministre des Affaires étrangères et européennes et de Monsieur le Ministre de la Défense à la question parlementaire urgente 2683 posée par l'honorable Député Monsieur Marc Goergen.


Jean Asselborn

**Gemeinsam Äntwert vum Här Aussen- an Europaminister a vum Här
Verdeedegungsminister op d'parlamentaresch Fro Nummer 2683
vum 19. August 2020 vum honorabelen Deputéierten, dem Här Marc Goergen**

1. Wéi evaluéiert d'Regierung de Putsch am Mali a wäert se Konsequenze fir d'Missioun EUCAP Sahel Mali mat sech zéien?

Antikonstitutionell Mesurë kënnen op kee Fall 'eng Äntwert sinn op déi déif gesellschaftspolitesch Kris déi de Mali säit Méint duerchlieft. D'Militär muss d'Muecht un d'Zivilisten zeréckginn an dëse sozial-politeschen Transitionsprozess muss zu demokratesche Wale féieren. Mir ruffen, zesumme mat der Europäescher Unioun, zu engem inklusiven Dialog am Mali op fir e Konsens ze erreechen deen déi demokratesch Verfassungsprinzippen, internationaalt Recht a Mënscherechter respektéiert. Dëst ass deen eenzege Wee fir déi weider Destabiliséierung net nëmme vum Mali mee vun der ganzer Sahel-Regioun ze vermeiden.

D'Konsequenze fir d'zivil Missioun vun der Europäescher Unioun EUCAP Sahel Mali si fir de Moment nach onkloer. Mir sinn am Gaang, zesumme mat onsen europäesche Partner, d'Situatioun ze analyséiere fir déi eventuell nächst Schrëtt kënnen duerchzuféieren.

2. Huet sech d'Risikolag fir eis Zaldoten am Mali ënnert der EUCAP Sahel Missioun verännert?

D'Missioun EUCAP Sahel Mali ass eng zivil EU Missioun an där keng Lëtzebuerger Zaldote matmaachen. Allerdéngs ass säit dem 1. Juni 2019 e Lëtzebuerger Polizist un dëser Missioun bedeelegt. D'Lëtzebuerger Zaldoten huelen Deel un der Missioun EUTM Mali an un der UNO-Missioun MINUSMA. De Putsch am Mali huet eng problematesch Sécherheetssituatioun nach méi volatil gemaach, ouni awer dass d'Risikolag fir d'Lëtzebuerger sur place am Moment sech grondleeënd geännert hätt.

3. Sinn eis Zaldoten am Mali a Sécherheet?

Eng honnertprozenteg Sécherheet kann et an engem Land wéi dem Mali an am Kontext vun esou Missiounen net ginn. Allerdéngs sinn d'Lëtzebuerger Zaldoten deementspriedend ausgebilt an equipéiert fir dass de Risiko kann op e Minimum reduzéiert ginn. Nom Putsch hunn d'Missiounen hir Memberen ugewise an de Lageren ze bleiwen, d'Bewaffnung ass der Situatioun ugepasst ginn an d'Evakuatiounspläng gi Revue passéiere gelooss. D'Stroosse sinn am Moment roueg an d'Putschisten hunn ugekënnegt hir Kooperatioun mat den internationale Missiounen weiderféieren ze wëllen. Mëttlerweil ass den erhéichte Stade d'alerte och nees erofgefuer ginn an d'Militär dierfen hier Base fir essentiell Deplacementer verloossen.